



18. marts 2014

UPA 2014/75

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

**Kalaallit Nunaata Isiginnaartitsivia 2013-misulli atugaqalersinnaaqqullugu 2015-mut Aningaasanut Inatsimmi, konto pingaarnermut 40.05.05 –mut Kalaallit Nunaata isiginnaartitsivianut 3 mio. Koruuninik immikkut aningaasaliisoqarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Andreas Uldum, Demokraatit)

### **Tunngavilersuut**

Tamanit ilisimanearpoq ataatsimoorluni naalagaaffinngornerup taamatullu ataatsimoorluni kinaassuseqarnerup aqutigisaraa pisuunik assigiinngisitaartumillu kulturikkut inuuneqarnek.

Kulturikkut ataatsimoorluni ataatsikkut ingerlaneq 2013 ukiakkut innarlerneqarpoq, naalakkersuisoqatigiit Siumut aamma Atassut aalajangermata Kalaallit Nunaata isiginnaartitsivia sipaarfigineqassasoq. Siumup Atassutillu taamaasillutik ataatsimoorluta kulturitta aningaasaliiffiginikinnerusalernera pisuussutigaat.

Pisoq pitsaanerulingilaq Ilinniartitaanermut, Ilageeqarnermut, Kulturimut Naligiisitaanermullu Naalakkersuisoq taamanili tamanut saqqummertalerpoq eqqunngitsunik oqalulluni, qularnanngitsumik taamaallaat siunertaralugu inuttaata aalajangerneratalu ilassilluarneqarnerunissaat. Taamatut pissusilersorneq nuanniissimavoq, kanngunarpoq peqqusiileqinarlunilu.

Demokraatini ajuusaarutigaarput Naalakkersuisoqatigiit aalajangernermikkut nunatta isiginnaartitsiviata atugai ajorseriartimmatigit. Tunngavilersuutit pitsaasut sulit tusanngilagut sooq kulturip akilertariaqarneraa Naalakkersuisut akisussaassusilimmik siumullu isigisumik aningaasaqarnermut politikkeqannginnerat.

Taamaattumik neriuppugut amerlanerussutillit katersorsinnaallugit Kalaallit Nunaata isiginnaartitsiviata 3 mio. koruuninik ulloq 1. januaari 2015 aallarnerfigalugu aningaasaliiffineqartalernissaanut, taakku aningaasaqarnerat 2013-misulli ilersikkumallugu.

### **Pisortanut aningaasarsiornikkut allaffissornikkullu kingunissai**

Aalajangiinerup kingunerissavaa, 2015-mi Aningaasanut Inatsisip inernerata 3 mio. koruuninik ajornerulernera. Aningaasat taakku Ilinniartitaanermut, Ilageeqarnermut, Kulturimut Naligiisitaanermullu Naalakkersuisoqarfiup maannakkut missingersuutaani nassaarinqarsinnaapput taamaasippat aningaasartuutit katinnerat arlaannaatigulluunniit pisortat aningaasaqarnerannut sunniuteqassanngilaq.

### **Namminersortunut aningaasarsiornikkut allaffissornikkullu kingunissai**

Soqanngilaq.



**Innuttaasunut aningaasarsiornikkut allaffissornikkullu kingunissai.**  
Soqanngilaq.